

Hordaland fylkeskommune hfk@hfk.no

Utval for opplæring og helse v/medlem

Austrheim og Knarvik vidaregåande skule - oppfølging av Hordaland fylkeskommune sin skulebruksplan 2017 – 2030

Regionrådet viser til gjeldande skulebruksplan 2017 – 2030. Regionrådet gjorde fylgjande vedtak i Regionrådet fredag 26. oktober som omhandlar framtida til Austrheim vidaregåande skule og Knarvik vidaregåande skule.

Vedtak:

Regionrådet visar til vedtak i Fylkestinget 22. juni 2016. «Austrheim vidaregåande vert oppretthalden. Endeleg vedtak om investering i ny skule vert gjort når det føreligg avklaring om ei framtidig regionreform. Det vert lagt til rette for god dialog med det lokale næringslivet i høve til nyinvesteringar og for å prøva ut nye undervisningsformer der meir av den praktiske undervisninga vert gjort ute i verksemdene. Studietilbodet ved Knarvik vert tilpassa søkjarar og elevtalsutvikling. Det vert investert i nytt bygg ved Juvikstølen i 2026.»

Regionrådet i Nordhordland er samla om at Nordhordland med Gulen og Solund treng to vidaregåande skuler. Dei to skulane utgjer skuletilbodet mellom Bergen nord og Sunnfjord. Regionrådet vil presisera at det er heilt avgjerande for langsiktig busetting i distrikta, å unngå at enno fleire elevar enn i dag får for lang reiseveg til skulen som ikkje gjer det mogleg å bu heime.

Erfaring viser at elevar som må bu på hybel, like gjerne vel å bu i Bergen (eller andre stader) som Knarvik, og distrikta mister ungdommane sine tidleg i utdanningsløpet. Regionrådet vil difor arbeida for at dei to vidaregåande skulane i regionen skal vera attraktive og det naturlege valet for ungdom som bur i regionen, men også ha eit så godt heilskapleg tilbod at skulane kan trekke til seg ungdom frå heile fylket.

Fylkestinget legg i investeringsplanen for vidaregåande skuler i Hordaland opp til eit parallelt løp for investeringar for skulane i Nordhordland. Regionrådet støttar at dette skjer parallelt og blir sett i samanheng. Me ønskjer imidlertid å koma i gong med arbeidet snarast råd med tanke på den dårlege forfatninga bygget til Austrheim vidaregåande skule samt delar av Knarvik vidaregåande skule er i.

Regionrådet støtter Austrheim kommune sitt brev til Hordaland fylkeskommune der dei ber fylkeskommunen om å setja av midlar i budsjettet for 2019 til å planleggja utforminga av framtidas skulebygg ved Austrheim vidaregåande skule, og at ein samtidig startar arbeidet med planlegging av eit oppgradert skulebygg i Knarvik. Næringslivet i Nordhordland er også ein pådrivar for dette, og vil vera med å finna gode løysingar på dette.

Prosjektet med å planleggja framtida til dei vidaregåande skulane i Nordhordland må sjåast i samanheng med dei pågåande prosjekta rundt den vidaregåande opplæringa i regionen som ser på nye undervisningsformer for yrkesfag med tettare samarbeid mellom næringsliv, offentleg sektor og privat næringsliv, og prosjektet der ein ser nærare på framtidig linestruktur i dei vidaregåande skulane basert på næringslivet sitt behov fram mot 2030.

Knarvik, 6. november 2018



Karstein Totland
Leiar Regionrådet Nordhordland



Rune Heradstveit
Dagleg leiar Regionrådet Nordhordland

Kopi: Kommunane i Region Nordhordland
Nordhordland Næringslag